



*i*fikrah

KELUARAN 22, BIL: 1/2018

JABATAN HAL EHWAL AGAMA ISLAM PULAU PINANG (JHEAIPP)

Edaran
PERCUMA



Dajjal Moden

- ◆ Fitnah Gajet ◆ Kod E Tidak Semestinya Haram
- ◆ Dekat tapi jauh ... ◆ Terlajak 'Send' Besar Akibatnya
- ◆ Bitcoin: Antara Samar dan Jelas



04-263 7200



04-250 2810



Jabatan Hal Ehwal
Agama Islam Pulau Pinang



<http://jaipp.penang.gov.my>

PENAUNG

YB Dato' Ir. Ahmad Zakiyuddin
bin Abd Rahman

Timbalan Ketua Menteri 1 merangkap Exco
Hal Ehwal Agama Islam, Pembangunan
Industri dan Pembangunan Masyarakat

PENASIHAT

Dato' Haji Sazali bin Haji Hussein
Pengaruh,

Jabatan Hal Ehwal Agama Islam Pulau Pinang

KETUA PENGARANG

Haji Yusoff bin Abu Bakar
Ketua Penolong Pengarah
Bahagian Dakwah, JHEAIPP

PENGARANG

Mumtazah binti Sanusi

PENOLONG PENGARANG

Emilfaizal bin Asrul

PEMBANTU PENGARANG

Mat Razhi bin Ahmad

SIDANG PENGARANG

Fathiah binti Abdul Rahman
Nor Liza binti Mohamad
Haslinda binti Harun
Mohd Fauzi bin Ibrahim
Bokhori bin Ariffin
Norhasni binti Othman
Mohamad Zaki bin Abdul Halim
Azizah binti Mat Isa
Ajwad bin Abdul Aziz

EDARAN

Bahagian Dakwah

DITERBITKAN OLEH:

Bahagian Dakwah, JHEAIPP

KONSULTASI & REKABENTUK:

Galeri Ilmu Sdn. Bhd.



IBADAH DAN GAJET

Setiap apa yang Allah SWT perintahkan pasti ada tujuan. Perintah pelaksanaan ibadah seperti solat, puasa dan zakat secara umumnya adalah bagi mendekatkan diri seorang hamba kepada Pencipta. Ia membentuk Muslim yang patuh dan taat serta menahan diri daripada melakukan maksiat agar berjaya dipakaikan 'jubah' taqwa yang sebenar-benarnya.

Namun, proses tersebut kian mencabar dengan kewujudan 'syaitan dan nafsu' alaf baharu dalam bentuk gajet (peranti).

Hati mengakui bahawa Allah adalah puncak kecintaan, namun realiti menunjukkan manusia seolah-olah menjadikan gajet seperti tuhan. Ia 'disembah' ketika berdiri, duduk dan baring. Tanpa segan silu membelek telefon bimbit di tangan walau pada saat bermunajat dengan Tuhan. Ketika solat, membaca al-Quran malah ketika menunaikan haji dan umrah, semuanya ingin dikemas kini status dan gambar di media sosial.

Secara fizikal, seorang Muslim yang memakai pakaian kotor pasti akan berasa tidak selesa untuk bersolat. Namun ramai pula yang selesa 'mengotorkan' solat dengan cenderung membesarkan gajet berbanding memberi tumpuan kepada Allah Yang Maha Besar.

Hakikatnya, telefon pintar atau peranti seperti ini adalah nikmat yang dikurniakan Allah sebagai alat untuk menambah rasa cinta dan mendekatkan diri kepada-Nya. Bukan untuk manusia hanyut dengan cinta dunia dan isinya.

Ibadah adalah bentuk komunikasi dengan Tuhan, Pemberi segala nikmat termasuklah keampunan sekiranya dikerjakan dengan sempurna. Justeru, teknologi canggih ini perlu dikuasai dengan penuh hikmah bagi menambah kualiti ibadah seterusnya melahirkan Muslim yang tinggi nilai adab dan ilmu. ❖

MUTIARA KATA

**"TIDAK ADA SESUATU PUN YANG LEBIH BAIK
DARIPADA LIDAH DAN HATI APABILA IA DIGUNAKAN
DENGAN BAIK. DAN, TIDAK ADA YANG LEBIH BURUK
DARIPADA LIDAH DAN HATI APABILA DIGUNAKAN
DENGAN CARA YANG TIDAK BAIK."**

Luqman al-Hakim

kandungan

- 3-4 **fokus**
Dajjal: Fitnah Terhebat Dunia
- 5-6 **sosial**
Fitnah Gajet
- 6-7 **muamalat**
Bitcoin: Antara Samar dan Jelas
- 7 **kenali tkm 1 negeri pulau pinang**
- 8-9 **undang-undang**
Di Skrin Gajet Mahligai Musnah
- 10-11 **lensa**
Gambar-gambar Peristiwa

- 12-13 **pengurusan masjid**
Tandas Masjid Bertaraf Hotel Lima Bintang?
- 14-15 **penguatkuasaan**
Terlajak Send Besar Akibatnya
- 16 **pendidikan**
Tanya Sama Google
- 17 **halal**
Kod 'E' Tidak Semestinya Haram
- 18 **inovasi**
Jadi Muslim Secara Online?
- 19 **diari**
JHEAIPP & i-Fiqh
- 20 **zon aulad**



Oleh: Nor Liza binti Mohamad
Bahagian Pengurusan Masjid dan Surau



DAJJAL MODEN

Dajjal: Fitnah Terhebat Dunia

Tahukah anda bahawa fitnah terhebat dalam sejarah kehidupan manusia ialah fitnah Dajjal? Kerana itulah, Rasulullah SAW ada bersabda:

“Sesungguhnya tidak ada fitnah di muka bumi ini yang paling hebat selain daripada fitnah yang dibawa oleh Dajjal. Setiap nabi yang diutuskan oleh Allah ada mengingatkan kaumnya tentang Dajjal. Aku adalah Nabi yang terakhir, sedangkan kamu adalah umat yang terakhir. Dajjal itu tidak mustahil akan datang pada generasi kamu. Seandainya dia datang sedangkan aku masih ada di tengah-tengah kamu, maka aku adalah sebagai pembela bagi setiap Mukmin. Sekiranya dia datang selepas kematianku, maka setiap orang menjaga dirinya. Dan sebenarnya Allah SWT akan menjaga orang-orang Mukmin.” (Riwayat Imam Muslim)

Selain itu, banyak lagi hadis yang membicarakan tentang dajjal dan peringatan agar kita sentiasa berwaspada menghadapi fitnah-fitnahnya terutama pada akhir zaman.

Penguhan Generasi Pro Dajjal

Seriusnya pesanan Rasulullah SAW tentang dajjal dan fitnah ini secara tersiratnya memperingatkan kita bahawa sebelum munculnya dajjal sebenar,

sebagaimana yang banyak disebutkan dalam hadis Rasulullah SAW, akan didahului dengan fitnah-fitnah yang bersifat pro dajjal.

Fitnah-fitnah bersifat pro dajjal ini hakikatnya adalah suatu strategi ke arah penyediaan generasi pro dajjal yang akan setia mendokongnya apabila dajjal yang sebenar muncul kelak. Bibit-bibit kemusnahan jatidiri Mukmin dan penguhan generasi pro dajjal semakin ketara pada hari ini.

Justeru, perbincangan tentang dajjal ini harus dikembangkan sejajar dengan perkembangan dunia kini yang menyaksikan fitnah dan penyelewengan agama berleluasa, kebenaran dimusuhi dan kesesatan dibela serta diperjuangkan.

Umat Islam di era fitnah dajjal kini ibarat menggenggam bara api, terpaksa menghadapi kesusahan, kesakitan dan tentangan dengan bersungguh-sungguh supaya agama tidak terlepas daripada genggaman.

Apa yang ada di sekeliling, tidak berupaya membantu atau memudahkan kita untuk melaksanakan tuntutan agama melainkan banyak sekali yang bersifat mendorong untuk membuat kemaksiatan dan perkara-perkara yang boleh meruntuhkan aqidah dan keimanan. Nafsu menguasai diri ibarat *beraja di mata bersultan di hati*. Fitnah dan serangan dajjal ini membabitkan pemusnahan *software* manusia iaitu sistem kepercayaan, pemikiran dan nilai, bukan *hardware* semata. Kesannya terserlah apabila ramai manusia menjadi hamba dunia, semakin luput maruahnyanya, mempunyai kecenderungan kepada perkembangan fizikal dan material sahaja tanpa mepedulikan perkembangan rohani dan spiritual.

Bersyukur atau Kufur?

Kemajuan sains dan teknologi seperti teknologi maklumat dan komunikasi,

CIRI-CIRI DAJJAL

1. Muncul di akhir zaman (tanda besar Hari Kiamat).
2. Buta sebelah mata.
3. Boleh mendengar dari jarak yang jauh.
4. Boleh melihat dengan sebelah mata semua yang berlaku termasuk mengelilingi dunia dalam masa yang singkat.
5. Boleh mengeluarkan khazanah daripada bumi seperti emas dan perak dengan mudah.
6. Boleh menurunkan hujan dan menumbuhkan tanaman.
7. Boleh mematikan dan menghidupkan orang yang telah mati.

Rasulullah SAW pernah berpesan sebagaimana hadis yang diriwayatkan oleh Imam Bukhari: “Dajjal keluar dengan membawa air dan api. Apa yang dilihat oleh manusia sebagai api ialah sebenarnya air yang dingin dan yang dilihat oleh manusia sebagai air ialah sebenarnya api yang membakar. Maka sesiapa di antara kalian yang berjumpa dengannya hendaklah mengambil yang di tangannya yang nampak seperti api kerana itu adalah air yang segar lagi dingin”.

teknologi perubatan, teknologi pertanian, teknologi peperangan dan lain-lain bidang teknologi yang serba canggih kini menyemarakkan lagi perhambaan kepada dunia. Teknologi canggih ini membolehkan manusia melihat dan mendengar tanpa batasan, tanpa had, merentasi masa dan sempadan, membolehkan penciptaan hujan tiruan, menumbuhkan tanaman dengan cepat dan mengeluarkan khazanah dari bumi yang tidak disangka seperti emas, perak, bijih timah dan minyak daripada dasar laut.

Teknologi perubatan pula berupaya menyembuhkan pesakit manakala teknologi peperangan boleh menyebabkan kemusnahan dan kematian ramai dalam masa yang singkat. Kecanggihan dan keupayaan teknologi moden material ini mampu memukau dan berkuasa sehinggakan orang yang lemah iman atau tidak beriman mempercayai seolah-olah itulah kuasa Tuhan. Mereka lupa bahawa kesemuanya itu adalah anugerah Tuhan untuk hamba-Nya supaya sentiasa bersyukur. Mereka memburu dan terus memburu dalam kejahilan.

Ternyata fitnah dajjal sangat menipu, mempersona dan memukau. Ia datang dengan membawa syurga dan neraka

yang mana hakikat sebenarnya syurga adalah neraka dan neraka adalah syurga. Bagi yang sedar akan keesaan Illahi, mereka berkesedaran untuk tidak menjadi pengikut dajjal. Mereka akan sedar bahawa itu adalah kehidupan generasi pro dajjal yang memukau dan menyesatkan.

Justeru, umat Islam diperingatkan agar tidak meletakkan dunia yang bersifat sementara semata-mata di hati dan tenggelam dengannya.

AMALAN AGAR DIJAUHKAN FITNAH DAJJAL

Melazimi Doa Nabi dalam solat (selepas Tahiyat Akhir, sebelum salam) yang bermaksud: *“Ya Allah, aku berlindung kepada-Mu dari seksa kubur, dari seksa neraka jahannam, dari fitnah hidup dan mati, dan dari fitnah dajjal.”*

Melazimi 10 ayat awal dan 10 ayat akhir dari Surah al-Kahfi setiap hari.

Sabda Nabi SAW yang bermaksud:

Sesiapa yang memelihara (beramal) dengan 10 ayat dari awal surah al-Kahfi, dia terlindung daripada dajjal. (Riwayat Imam Muslim).

Firman Allah SWT: “Ketahuilah bahawa (yang dikatakan) kehidupan dunia itu tidak lain hanyalah (bawaan hidup yang berupa semata-mata) permainan dan hiburan (yang melalaikan) serta perhiasan (yang mengurangkan), juga (bawaan hidup yang bertujuan) bermegah-megah di antara kamu (dengan kelebihan, kekuatan dan bangsa keturunan) serta berlumba-lumba memperbanyakkan harta benda dan anak pinak; (semuanya itu terhad waktunya) samalah seperti hujan yang (menumbuhkan tanaman yang menghijau subur) menjadikan penanamnya suka dan tertarik hati kepada kesuburannya, kemudian tanaman itu bergerak segar (ke suatu masa tertentu) selepas itu engkau melihatnya berupa kuning; akhirnya ia menjadi hancur bersepai; (dan hendaklah diketahui lagi) bahawa di akhirat ada azab yang berat (disediakan bagi golongan yang hanya mengutamakan kehidupan dunia itu) dan ada pula keampunan besar serta keredhaan dari Allah (disediakan bagi orang-orang yang mengutamakan akhirat). Dan (ingatlah) bahawa kehidupan di dunia ini tidak lain hanyalah kesenangan bagi orang-orang terpedaya.” (Al-Hadid 57: 20)

Ayat ini jelas memberikan panduan kepada umat Islam agar tidak menjadi hamba dunia. Contohnya peribadi Rasulullah SAW yang hidup dengan penuh kezuhudan, mengambil dunia hanya untuk mencukupi, tidak berlebihan, meninggalkan yang melalaikan dan menggunakan kelebihan dunia untuk Allah SWT.

Justeru, berwaspadalah dengan kemunculan dajjal dan fitnah dajjal yang merujuk kepada sistem yang

Surah	Panduan 10 Ayat Terawal Surah al-Kahfi
Ayat 1	Menjadikan al-Quran sebagai manual panduan kehidupan yang tetap lagi benar.
Ayat 2	Meyakini bahawa Al-Quran menjelaskan perbezaan antara kebenaran dan kebatilan serta balasan kepada yang ingkar dan yang taat.
Ayat 3	Meyakini akan adanya perhitungan dan pembalasan oleh Allah SWT selepas mati.
Ayat 4	Sentiasa berwaspada dan tidak menyekutukan Allah.
Ayat 5	Berwaspada dengan puak-puak yang jahil yang suka berdusta.
Ayat 6	Berwaspada dengan fitnah dan propaganda yang boleh menguasai minda dan mencipta persepsi songsang terhadap agama.
Ayat 7	Menginsafi bahawa dunia hanyalah medan ujian dan bersifat sementara.
Ayat 8	Mengawal diri supaya tidak menjadi hamba kepada dunia yang bersifat sementara kerana dunia akan datang dengan mudah jika akhirat diutamakan.
Ayat 9	Mengambil pengajaran daripada kisah Ashabul Kahfi yang menunjukkan bukti kebesaran Allah dan apa sahaja yang berlaku atas kehendak dan kuasa-Nya.
Ayat 10	Mengamalkan *doa sebagaimana doa Ashabul Kahfi agar diberi kekuatan dan terus istiqamah dengan ajaran Islam pada akhir zaman yang serba keliru dan songsang.

tidak berteraskan nilai-nilai keimanan tetapi dipengaruhi oleh nilai-nilai dajjal. Sesungguhnya sesiapa yang sanggup beristiqamah menghindarkan dirinya daripada rangkaian tersebut, maka ia bakal bebas daripada puncak fitnah iaitu dajjal itu sendiri. Sebaliknya sesiapa yang mengikuti serta menyemarakkan rangkaian fitnah sebelum datangnya dajjal, nescaya ia mudah menjadi sasaran tipu daya dajjal.

Ya Allah! Lindungilah kami daripada Dajjal.

Allah telah mendedahkan kepada kita ruang-ruang strategik dalam kehidupan seharian yang diintai oleh dajjal. Ia dirumus secara ringkas dan padat di dalam al-Quran melalui 10 ayat awal surah al-Kahfi. Jika tidak peka mengenainya, kita sangat berpotensi menjadi mangsa tipu daya dajjal.

** "Wahai Tuhan kami! Kurniakanlah kepada kami rahmat dari sisi-Mu, dan berilah kemudahan-kemudahan serta pimpinan kepada kami untuk keselamatan agama kami." ❖*

Kisah Gila Gajet

Beratur 4 Hari - Seorang Gadis Berjaya Beli iPhone X hanya dengan RM10

EMPAT hari! Itulah rekod yang dipegang oleh seorang rakyat Malaysia yang beratur selama 98 jam di hadapan sebuah premis di Sunway Pyramid. Rekod ini mengatasi rekod seorang pembeli di Singapura yang beratur selama dua hari. Usahanya ternyata berbaloi apabila telefon dengan perisian terkini yang bernilai ribuan ringgit ini diperolehi hanya dengan RM10!



sosial



Oleh: Fathiah binti Abdul Rahman,
Bahagian Dakwah



FITNAH GAJET

Teknologi maklumat telah melalui pelbagai proses inovasi dalam bidang perfileman, pengkomputeran, animasi dan pelbagai ciptaan yang bertujuan memudahkan kehidupan. Walau bagaimanapun, pada masa yang sama ia turut menimbulkan kebimbangan apabila ia disalah guna dan menjadi bahan penyebaran fitnah sesama manusia sehingga berlakunya perbalahan serta merosakkan akidah umat Islam.

Industri perfileman misalnya, pada asalnya dicipta untuk mengurangkan tekanan perasaan manusia. Namun secara perlahan-lahan unsur ganas, seks bebas dan budaya songsang diselitkan dalam filem. Anasir tidak sihat ini menjadi tular melalui

tayangan di panggung wayang di seluruh dunia dan kemudiannya disalurkan ke kaca televisyen di rumah-rumah. Manusia mula meniru gelagat pelakon atau penyanyi yang menjadi idola mereka. Muzik, fesyen pakaian, makanan segera serta filem-filem berorientasikan gaya hidup Barat berjaya menyelinap ke seluruh dunia tanpa sempadan.

Perkembangan teknologi maklumat ini juga menyebabkan manusia menggunakan komputer secara berleluasa. Komputer riba dibawa ke mana-mana. Seterusnya manusia menjadi terlalu ghairah dengan telefon tangan pula. Agar tidak ketinggalan zaman, telefon sering ditukar umpama menukar pakaian. Aneh sekali jika masa kini seseorang

itu tidak memiliki telefon pintar. Apa saja aplikasi dapat diakses dengan mudah dan cepat tanpa kawalan.

Apa yang membimbangkan, penggunaan *gajet* (peranti) pada hari ini digunakan secara tidak sihat hingga menimbulkan ketagihan tegar di kalangan pengguna. Menurut kajian pakar, kanak-kanak yang terdedah kepada telefon pintar pada usia yang muda secara keterlaluan boleh merencatkan pertumbuhan minda seperti masalah pertuturan, penglihatan dan tumbesaran. Sindrom ini dikenali sebagai “*Excessive Screen Exposure*” atau pendedahan skrin yang keterlaluan.

Dunia luas yang diciptakan Allah SWT untuk kita berjalan di atas muka bumi-Nya ini telah menjadi sempit sejak kewujudan pelbagai jenis peranti yang semakin canggih. Rumah tangga juga boleh menjadi porak-peranda disebabkan pasangan dengan mudah boleh bertemu dan menjalin hubungan sulit. Pergerakan atau tempat yang dikunjungi oleh pasangan dapat dijejaki melalui GPS (*Global Positioning System*) yang ada di telefon pintar. Rekod perceraian juga menunjukkan ada suami isteri yang berpisah hanya kerana aplikasi “WhatsApp”, “WeChat” dan seumpamanya.

Oleh itu, berwaspadalah dan sentiasalah mengamalkan prinsip kesederhanaan sebagaimana yang dianjurkan oleh Islam. Letakkanlah neraca Iman, Islam dan Ihsan sebagai timbangan.

“Telefon itu pintar, anda pula bagaimana?” Jadilah hamba Allah yang bijaksana. Renungilah firman Allah di dalam Surah al-Mulk ayat 9 yang bermaksud:

Sesungguhnya orang yang takut (melanggar hukum) Tuhan mereka semasa mereka tidak dilihat orang dan semasa mereka tidak melihat azab Tuhan, mereka beroleh keampunan dan pahala yang besar. ❖



Oleh: Mohamad Zaki bin Haji Abdul Halim,
Masjid Daerah Seberang Perai Selatan



BITCOIN: ANTARA SAMAR DAN JELAS

Mata wang adalah perkara utama dalam syariah. Ia diperlukan sebagai alat pertukaran antara manusia (untuk mengelak pertukaran secara tukaran barangan) dan sebagai satu alat ukuran untuk penilaian (barang atau perkhidmatan) serta tanda aras penyimpanan nilai sesuatu barang atau perkhidmatan.

Kini wujud pula matawang digital atau dikenali dengan *Bitcoin*. Ia telah mula diperkenalkan oleh penciptanya, Satoshi Nakamoto sekitar tahun 2008. Satu artikel bertajuk “*Bitcoin: A Peer-to-Peer Electronic Cash System*” telah disebarkan melalui internet pada November 2008, lanjutan daripada itu pada Januari 2009 rangkaian matawang digital atau *Bitcoin* telah mula dilancarkan.

Berbeza dengan matawang kertas, *Bitcoin* adalah matawang elektronik sepenuhnya yang bukan dalam bentuk fizikal. Bitcoin juga tidak dikawal selia oleh mana-mana badan atau institusi sebagaimana kebiasaan matawang-matawang yang lain. Disebabkan tiada kawalan daripada badan berautoriti, banyak transaksi *Bitcoin* yang dilakukan oleh pengguna gagal dan ia menyebabkan berlakunya kerugian kepada pengguna. Satu kajian berkenaan penggunaannya telah dilakukan dan menunjukkan bahawa 40% daripada transaksi pertukaran *Bitcoin* tidak berjaya malah membawa kepada kerugian kepada penggunanya.

Meninjau dari sudut perspektif syariah, beberapa perkara perlu diteliti dan diambil perhatian berkenaan penggunaan *Bitcoin* sebagai matawang berdasarkan hukum fikah dan juga dari sudut ekonomi Islam.

Merujuk kepada hukum fikah, *Bitcoin* adalah matawang yang diwujudkan tidak dalam bentuk fizikal, justeru *qabd* (pemilikan) kepada matawang ini hanya berlaku secara *hukmi* sahaja dan tidak berlaku secara fizikal. Oleh itu hukum-hakam berkaitan *qabd hukmi* (pemilikan konstruktif) hendaklah dipatuhi. Sebagai contoh, selepas berlaku *qabd* maka tanggungan akan bertukar tangan dan penerima mempunyai hak sepenuhnya untuk menggunakan *Bitcoin* yang diperolehinya.

Sebagai suatu bentuk matawang, ia juga terikat dengan hukum-hakam *al-Sarf* (pertukaran wang) sekiranya ia melibatkan pertukaran matawang atau pembelian item ribawi seperti emas dan perak. Jika sekiranya pembelian menggunakan *Bitcoin* yang melibatkan item *ribawi* seperti emas, maka pembayaran hendaklah dilakukan *yadan bi yadin* (serentak) ketika transaksi jual beli itu berlaku. Begitu juga jika transaksi melibat pertukaran antara *Bitcoin* dengan matawang lain, maka hendaklah dilakukan tanpa sebarang penangguhan.

Dari sudut ekonomi Islam pula, walaupun *Bitcoin* dikatakan sebagai matawang tetapi ia sebenarnya tidak berasaskan kepada apa-apa aset sebagai dasar. Justeru, ia begitu mudah terdedah kepada spekulasi. Keadaan ini boleh menyebabkan harga satu unit *Bitcoin* naik secara mendadak dari tahun ke tahun.

Sebagai contoh, pada 2010 satu unit *Bitcoin* adalah bernilai USD 0.01. Manakala pada tahun 2014, satu

unit *Bitcoin* telah meningkat dengan kadar nilai melebihi USD550.00. Pada awal tahun 2011, kenaikan nilai *Bitcoin* dalam sehari direkodkan antara 5-10%, namun begitu sebaliknya ia juga boleh menurun secara mendadak.

Menurut perspektif ekonomi Islam, antara ciri-ciri matawang ialah suatu yang nilainya stabil dan boleh dijadikan ukuran untuk aset-aset lain.

Kesimpulannya, dari sudut ekonomi Islam *Bitcoin* tidak sesuai untuk dijadikan sebagai matawang kerana ia boleh dimasuki unsur-unsur spekulasi yang melampau. Malah nilainya juga tidak stabil dan boleh naik secara mendadak. Ia juga tidak dikawal oleh mana-mana badan berautoriti dan tidak menepati ciri-ciri utama matawang yang diharuskan syarak. ❖



KENALI TKM 1 NEGERI PULAU PINANG

“Alhamdulillah, saya sahut cabaran ini dan sedia menggalas amanah yang telah dipertanggungjawabkan oleh Kerajaan Negeri Pulau Pinang.”

BERBEZA bagi penggal ini, pembangunan hal ehwal agama Islam diletakkan di bawah portfolio Timbalan Ketua Menteri I Pulau Pinang. Sebagai muka baru, **YB DATO' Ir. AHMAD ZAKIYUDDIN BIN ABD RAHMAN**, 59, langsung tidak menduga bahawa beliau yang perlu menggalas tugas berat berkenaan.

Mempunyai latar belakang sebagai seorang jurutera profesional dan memiliki syarikat perunding kejuruteraan di Sungai Petani, Ahmad Zakiyuddin turut bergiat aktif dalam aktiviti kemasyarakatan. Pernah dilantik sebagai Ahli Lembaga Pengarah Zakat Pulau Pinang dan merupakan Timbalan Yang di-Pertua Majlis Agama Islam Pulau Pinang (MAIPP), beliau mengakui agak terkejut apabila namanya dipilih untuk memikul tanggungjawab sebagai Timbalan Ketua Menteri I Pulau Pinang.

“Pada Pilihan Raya Umum Ke-14 yang lalu, saya berjaya memenangi kerusi Dewan Undangan Negeri (DUN) N03 Pinang Tunggal dengan hanya majoriti 127. Jadi, saya tidak menyangka (pelantikan tersebut) kerana pada pendapat saya ada lagi calon-calon yang lebih hebat. (Dan) sebagai Exco Hal Ehwal Agama Islam, Pembangunan Industri dan Perhubungan Masyarakat, pastinya saya akan memberikan yang terbaik,” ujarnya.

Latar belakang pendidikan dan kerjaya politik

Selepas menamatkan pengajian di Sekolah Menengah Sains Sungai Petani, Ahmad

Zakiyuddin melanjutkan pengajian di peringkat A-Level di *University of Salford, United Kingdom* sebelum meneruskan pengajian dalam bidang kejuruteraan awam.

Pernah berkhidmat dengan Jabatan Kerja Raya (JKR) selama 10 tahun, beliau merupakan antara individu yang bertanggungjawab membangunkan Bandar Bertam, Seberang Perai Utara (SPU). Beliau cukup disegani ekoran pencapaiannya dalam bidang kejuruteraan terutama dalam pembinaan masjid serta pusat pengajian tinggi di Transkrian. Keterlibatan Ahmad Zakiyuddin yang menganggap dirinya sebagai ‘*Bertam Boy*’, lebih terserlah apabila beliau dipilih menjadi Pengerusi Qariah Masjid At-Taqwa, Taman Bertam Indah. Masjid ini pernah memenangi Anugerah Masjid Kariah Ketiga Terbaik Peringkat Kebangsaan tahun 2014 anjuran JAKIM.

Cabaran baru & moto ‘First Things First’

Sebagai muka baru yang dilantik ke jawatan tertinggi pentadbiran negeri, bapa kepada enam orang anak ini akui cabaran utama buat beliau adalah masa. Jelas Ahmad Zakiyuddin lagi, sepanjang bulan pertama ini, beliau akan memberi fokus untuk merapatkan ukhuwah bersama-sama agensi dan jabatan kerajaan berwajib.

“Saya berpegang kepada moto ‘First Things First’ sebagai panduan. Setiap tugas perlu disiapkan satu demi satu, langkah demi langkah. A journey of a thousand miles begins with a single step.” katanya.

Hal Ehwal Agama Islam & Perpaduan Kaum di Pulau Pinang

Bagi Ahmad Zakiyuddin, Exco terdahulu, Dato’ Abdul Malik Abul Kassim telah melakukan yang terbaik dalam memartabatkan Islam di Pulau Pinang.

“Pastinya saya akan meneruskan apa jua yang terbaik yang telah dilakukan oleh beliau (Abdul Malik) dan amat berterima kasih kerana beliau telah berjaya mengimarahkan masjid-masjid serta surau-surau di Pulau Pinang. Malah, bagi membawa reformasi dalam semua aspek berkaitan Islam, moto ‘*Rahmatan Lil ‘Alamin*’ iaitu Islam sebagai rahmah bagi sekalian alam yang dipelopori sebelum ini akan diteruskan. Saya juga berhasrat mengembalikan kegemilangan Islam dengan menjadikan masjid-masjid di Pulau Pinang sebagai pusat kegiatan ummah. Peranan Jawatankuasa Kemajuan dan Keselamatan Komuniti (JKKK) juga akan diperkasakan bagi menyemarakkan perpaduan semua kaum di Negeri Pulau Pinang.” jelasnya. ❖





Oleh: Haslinda binti Harun
Bahagian Pendakwaan

DI SKRIN GAJET MAHLIGAI MUSNAH

Kehidupan manusia hari ini semakin hari semakin maju seiring dengan perkembangan teknologi masa kini. Kewujudan pelbagai bentuk aplikasi perhubungan alam maya telah banyak mendekatkan yang jauh dan kadangkala boleh menjauhkan yang dekat. Internet sebagai media komunikasi moden telah menjadikan dunia semakin mudah diterokai. Walau bagaimanapun, kita perlu berhati-hati dalam mengecapi kecanggihan teknologi moden ini agar tidak hanyut dan alpa dengan risiko di sebaliknya.

Sejak kebelakangan ini, wujud *trend* baharu penyambung silaturrahim di kalangan masyarakat. Sahabat-sahabat lama dari sekolah rendah hingga universiti, pejabat, kejiranan dan persatuan berjaya dijejaki dan disatukan dalam satu kumpulan alam maya melalui aplikasi “WhatsApp”. Perjumpaan dan perbualan di alam maya seterusnya dipanjangkan ke majlis-majlis ‘reunion’. Keterujaan mengimbau kisah silam dan masalah yang sedang dihadapi bersama

‘kawan’ lama sehingga kadangkala terlupa status yang dipegang. Begitu juga laman sosial “Facebook” yang menjadi medan meluahkan rasa sehingga menimbulkan kesangsian pasangan masing-masing hingga membawa kepada keruntuhan institusi rumah tangga.

Harian Metro keluaran Jumaat, 19 Januari 2018 memetik Ketua Hakim Syarie Negeri Terengganu, Wan Mohd Zakri bin Wan Mohd sebagai berkata bahawa media sosial turut menjadi antara faktor yang menyebabkan perceraian. Beliau berkata, “*Saya akui isu adanya Facebook dan WhatsApp menyebabkan berlaku salah faham suami isteri sehingga membawa kes itu ke mahkamah seterusnya menyumbang kepada faktor yang membawa perceraian*”.

Terdapat 3 seksyen dalam Enakmen Kesalahan Jenayah Syariah (Negeri Pulau Pinang) 1996 (EKJSPP) telah diperuntukkan dalam menangani isu orang ketiga dalam rumah tangga seperti yang berikut:

Bil	Seksyen	Peruntukan	Hukuman
1	Seksyen 36 EKJSP 1996	Memperuntukkan mereka yang disabitkan kesalahan memujuk lari atau membawa pergi atau mempengaruhi isteri orang lain untuk meninggalkan rumah dan suaminya.	Denda tidak melebihi lima ribu ringgit atau penjara tidak melebihi tiga tahun atau kedua-duanya sekali.
2	Seksyen 37 EKJSP 1996	Memperuntukkan hukuman bagi sesiapa sahaja yang menghalang pasangan yang sudah berkahwin hidup sebagai suami isteri.	Denda tidak melebihi dua ribu ringgit atau dipenjarakan selama tempoh tidak melebihi satu tahun atau kedua-duanya.
3	Seksyen 38 EKJSP 1996	Memperuntukkan bagi mana-mana orang yang menghasut suami atau isteri supaya bercerai atau mengabaikan kewajipan mereka.	Denda tidak melebihi lima ribu ringgit atau dipenjarakan selama tempoh tidak melebihi tiga tahun atau kedua-duanya.

Undang-undang yang diperuntukkan ini adalah bagi menjaga keharmonian hidup dan kerukunan sesebuah rumah tangga. Namun demikian, walau sesempurna mana pun undang-undang yang digubal dan diwartakan, usaha daripada masyarakat bagi menjaga dan memupuk keharmonian hidup berumah tangga amat penting. Justeru, seharusnya setiap pasangan suami isteri perlu menjaga syariat agama dalam mengekalkan kebahagiaan rumah tangga, agar mahligai yang dibina tidak mudah runtuh kerana kealpaan masing-masing. ❖

NOMOFOBIA

SATU PERASAAN TAKUT UNTUK HIDUP TANPA TELEFON ATAU GAJET. SESEORANG ITU AKAN MENGHABISKAN SEBAHAGIAN BESAR MASA SEHARIAN DENGAN MENGHADAP TELEFON SAMA ADA MELAYAN MEDIA SOSIAL ATAU MEMERIKSA MESEJ SECARA BERULANG KALI TANPA HENTI. IA BOLEH BERTUKAR MENJADI MASALAH KESIHATAN YANG SERIUS JIKA TIDAK DITANGANI DENGAN SEGERA.

Suami Asyik dengan Telefon

Pendakwah terkenal, Ustaz Ebit Liew berkongsi pengalaman beliau ketika menganjurkan program **Keluarga Sunnah**. Beliau mendapat banyak soalan terutamanya daripada peserta wanita (isteri) yang bertanya apa yang perlu mereka lakukan untuk menarik perhatian suami yang paginya sibuk bekerja, tapi apabila pulang ke rumah sibuk pula melayan telefon di tangan.

Si isteri yang hanya mahukan perhatian setelah letih menguruskan rumah tangga seharian, terasa dikesepikan. Sudahlah begitu, para suami juga suka keluar malam dan menghabiskan masa bersama kawan-kawan. Tiada komunikasi antara mereka, jauh sekali membantu urusan rumah tangga.

**Tip
Keluarga
Bahagia**



Tip Buat Suami daripada Ustaz:

1. Anjur Majlis Ilmu

Keluarga yang sering membaca al-Quran, hadis dan berkongsi ilmu bersama, Allah akan campakkan rasa tenang. Rumah kelihatan bercahaya di sisi penghuni langit.

2. Makan Bersama

Jadikan amalan makan berjemaah. Lebih baik jika dapat makan mengikut sunnah seperti makan di dalam talam dan saling suap-menyuap. Hati menjadi lebih rapat dan bersatu.

3. Jauhi Gajet

Saat di rumah, masa ditumpukan hanya untuk keluarga. Gajet diletak jauh-jauh. Solat jemaah, majlis ilmu, bahagi tugas dalam rumah bersama, tidurkan anak dengan kisah Nabi dan para sahabat perlu dijadikan amalan.

4. Layan dan Hargai Isteri

Sentiasa pamerkan rasa sayang dan penghargaan terhadap isteri melalui ucapan dan perbuatan. Menjadi orang yang terakhir tidur selepas semua ahli keluarga tidur. Menjadi orang pertama bangun dan mengejutkan ahli keluarga untuk bangun beribadat bersama.



KEJOHANAN BOWLING KELAB SUKAN & KEBAJIKAN JHEAIPP



BANTUAN KHAS KEPADA IMAM, BILAL, SIAK, GURU TAKMIR DAN GURU KAFA OLEH TUAN YANG TERUTAMA TUN DATO' SERI UTAMA (DR.) HAJI ABDUL RAHMAN BIN HAJI ABBAS



PERJUMPAAN GURU-GURU KAFA SELURUH NEGERI PULAU PINANG.



MAHRAJAN AL-ISLAM RAHMATUN LIL ALAMIN PERINGKAT NEGERI PULAU PINANG



KURSUS METHODOLOGI BAHAGIAN DAKWAH



KARNIVAL MASJID TERBUKA, KLINIK CELIK UNDANG-UNDANG KELUARGA ISLAM DAN FORUM ULAMA LAWAN RASUAH



BENGKEL CELIK IT, UNIT LATIHAN JHEAIPP



SEMINAR HALAL NEGERI PULAU PINANG



BARISAN SIDANG REDAKSI MAJALAH I-FIKRAH JABATAN HAL EHWAL AGAMA ISLAM PULAU PINANG



PENULIS KHUTBAH NEGERI PULAU PINANG BERSAMA PENGARAH JABATAN HAL EHWAL AGAMA ISLAM PULAU PINANG



MAJLIS PELANCARAN BULAN-BULAN AL-QURAN PERINGKAT NEGERI PULAU PINANG TAHUN 2018



BENGKEL PENULISAN TEKS KHUTBAH TAHUN 2018



TANDAS MASJID BERTARAF TANDAS HOTEL LIMA BINTANG?

Tandas Masjid Bersih Cetusan Kualiti Iman

Seringkali kita mendengar keluhan mengenai tandas dan persekitaran masjid yang kotor dan tidak memuaskan. Persepsi negatif seperti ini amat mendukacitakan dan usaha membina persepsi dan nilai baru terhadap penjagaan kebersihan masjid ini perlu digerakkan. Seajar dengan moto Islam “Kebersihan Sebahagian daripada Iman” yang perlu dibudayakan dalam kehidupan harian, dan perlu dijiwai kerana secara langsung ia juga mencerminkan imej Islam dan umatnya.

Kempen Kesedaran dan Akauntabiliti

Dalam konteks ini, tanggungjawab penjagaan kebersihan di masjid dan persekitarannya ini merupakan

tanggungjawab pentadbir masjid khususnya, dan semua umat Islam umumnya. Usaha-usaha meningkatkan tahap kebersihan ini tidak akan berjaya direalisasikan tanpa kerjasama dan komitmen pentadbir dan juga ahli jemaah masjid.

Oleh itu, kesedaran dan keperihatinan ahli jemaah perlu dipertingkatkan melalui promosi, hebahan kempen kesedaran dan rasa kebertanggungjawaban terhadapnya. Para pentadbir masjid perlu kepada sistem kebersihan berjadual dan sentiasa membuat pemantauan. Amatlah mendukacitakan sekiranya masjid amat aktif dengan pelbagai program, tetapi aspek kebersihan masjid diabaikan.

Usaha menangani persepsi negatif tentang kebersihan masjid diberi

perhatian serius oleh Kerajaan Negeri Pulau Pinang dan Majlis Agama Islam Negeri Pulau Pinang (MAINPP). Melalui Jabatan Hal Ehwal Agama Islam Pulau Pinang (JHEAIPP), beberapa program dan aktiviti telah dan akan terus dilaksanakan. Selain daripada aktiviti pemantauan berkala terhadap masjid-masjid, mulai tahun 2015 JHEAIPP telah melaksanakan program penarafan masjid kariah dan antara skop yang diaudit adalah **Pengurusan Kebersihan Bilik Air dan Tempat Wuduk.**

Inisiatif juga telah diambil oleh Kerajaan Negeri melalui Pihak Berkuasa Tempatan yang telah menyenaraikan tandas masjid sebagai salah satu kategori tandas awam yang turut diaudit dan diberi penarafan bintang pada setiap tahun. Tandas masjid juga turut dipertandingkan dalam Pertandingan

Tandas Bersih Peringkat Negeri Pulau Pinang mulai tahun 2016 sempena Sambutan Hari Tandas Sedunia yang diadakan pada setiap tahun.

Keputusan Pertandingan Tandas Awam Bersih (Kategori Masjid) Peringkat Negeri Pulau Pinang Tahun 2017	
Pertama	Masjid Jamek Tasek Junjong, Seberang Perai Tengah
Kedua	Masjid Kampung Besar, Seberang Perai Selatan
Ketiga	Masjid Bukit Panchur, Seberang Perai Selatan

Kebersihan bukan sekadar terletak pada kebersihan diri tetapi juga melibatkan persekitaran termasuklah tandas.

Menjadi satu tamparan yang sangat hebat kepada kita umat Islam jika kebersihan masjid masih berada pada tahap yang rendah sedangkan Islam itu tinggi. Justeru marilah kita pupuk sikap cintakan kebersihan agar keindahan Islam dapat diserlahkan.

“Jangan engkau solat di masjid itu (masjid yang dibina oleh orang munafik) selama-lamanya, kerana sesungguhnya (Masjid Quba’ yang engkau bina wahai Muhammad), yang telah didirikan di atas dasar taqwa dari mula (wujudnya), sudah sepatutnya engkau solat padanya. Di dalam masjid itu ada orang-orang lelaki yang suka (mengambil berat) membersihkan (mensucikan) dirinya; dan Allah mengasihi orang-orang yang membersihkan diri mereka (zahir dan batin).”
(At-Taubah: 108) ❖

Jangan Jadi Hamba Gajet

Oleh: Nor Liza binti Mohamad
Bahagian Pengurusan Masjid dan Surau



Ibarat Irama dan Lagu

Gajet merupakan teknologi baru yang mencetuskan fenomena hebat pada masa kini. Ia sukar dipisahkan daripada pemiliknya, bagaikan irama dan lagu. Ia akan dibawa ke mana sahaja termasuklah ke dalam masjid terutama sekali *handphone*. Tiada hukum yang jelas tentang penggunaan teknologi komunikasi di dalam masjid. Walau bagaimanapun, ada hukum yang jelas mengenai larangan mengganggu orang yang solat sama ada secara sengaja atau tidak sengaja.

Suatu ketika, Nabi SAW pernah keluar menemui orang ramai. Baginda mendapati ramai orang sedang bersolat, manakala ramai pula yang membaca al-Quran dengan suarau yang tinggi dan nyaring.

(Melihat yang demikian), Rasulullah SAW pun bersabda: *“Sesungguhnya orang yang sedang bersolat itu sedang bermunajat dengan Tuhan-Nya, maka seharusnya dia mengetahui apa yang diperkatakannya itu. Dan janganlah pula sebahagian kamu mengeraskan suara melebihi yang lainnya dalam membaca al-Quran.”* (Riwayat Imam Ahmad).

Dalam konteks ini, bunyi deringan telefon atau apa sahaja gajet adalah antara perkara yang boleh mengganggu solat sama ada diri sendiri atau jemaah di sekitarnya.

Penggunaan Gajet di Masjid: Utamakan Apa yang Patut

Masjid adalah rumah Allah yang perlu dijaga adab dan etika bagi menjamin kesuciannya. Belajarlah untuk tidak menyibukkan diri dengan urusan dunia termasuk penggunaan gajet yang boleh melalaikan diri daripada mengingat Allah ketika berada di dalam masjid. Sesungguhnya tiada panggilan yang lebih penting kecuali panggilan Ilahi. Kenapa tiada seorang pemain pun yang membawa gajet ketika menyertai mana-mana perlawanan sukan seperti bola sepak? Mustahil ia dilakukan sedang pemain perlu fokus sepenuhnya sepanjang bermain. Maka prinsip yang sama perlu diaplikasikan di dalam masjid. Tepuk dada tanyalah iman, apakah yang lebih utama selain rasa khushyuk kepada Allah Taala?

Jadilah Pengguna Bijak

Peringatan untuk menutup gajet di dalam masjid adalah antara langkah proaktif bagi menjamin ketenangan dan kekhusyukan para jemaah. Mematuhi peraturan berkenaan adalah satu usaha ke arah **“menutup pintu kerosakan”**. Namun perlu diingatkan gajet ibarat sebilah pisau. Ia mendatangkan kebaikan di tangan pengguna yang baik begitulah sebaliknya. Teknologi untuk dikuasai bukan menguasai. Sebagai pengguna bijak, jadikan ia hanya sebagai wasilah untuk mencapai redha Tuhan di dunia dan akhirat. ❖



TERLAJAK 'SEND' BESAR AKIBATNYA

*"Terlajak perahu boleh diundur,
terlajak kata buruk padahnya".*

Pasti ramai yang masih ingat dan mengerti maksud dari pepatah di atas bukan?

Sedar tak sedar, walau lapuk ditelan zaman, peribahasa ini masih meniti di bibir masyarakat kita. Keabsahan penggunaan pepatah ini hingga kini membuktikan perbuatan *'terlajak kata'* amat sinonim dengan budaya masyarakat kita termasuklah bangsa Melayu. Seiring dengan peredaran zaman ke arah yang lebih moden, *'terlajak kata'* juga turut dimodenisasikan. Walaupun dengan metod yang berbeza, tetapi *hadaf* (matlamat), erti serta impaknya tetap sama. Ia boleh kita sebut sebagai ***'terlajak send'***.

Bersesuaian peredaran masa dan perkembangan teknologi, masyarakat dewasa ini tidak hanya berkata-kata dengan pancaindera kurniaan Ilahi, bahkan mampu berkomunikasi dengan perantaraan

'keyboard' mahupun *'keypad'* ciptaan manusia. Dalam situasi gembira, sukacita dan bahagia; tidak kurang juga dalam marah, dendam dan benci, kita lebih terbiasa mencapai gajet untuk meluakkannya melalui susunan huruf dan dilengkapi *'emoticon'*. Butang *'send'* ditekan. Dalam beberapa detik, ia dikongsi oleh mereka yang senada dan seirama.

Secara tidak langsung, suasana sebegini bakal melahirkan masyarakat yang tidak bertanggungjawab dengan apa yang ditulis dan dikongsi. Ini mungkin juga kerana mereka menyangka bahawa identiti mereka *majhul* (tidak dikenali) atau *'anonymous'*. Budaya *'melepaskan batuk di tangga'* dan *'menangguk di air keruh'* mungkin berlaku.

Akhirnya, khabar yang di *'send'* kemudian di *'share'* akhirnya di *'up'*,

** 'UP' adalah salah satu istilah yang digunakan dalam jual beli atas talian*

(online). Ia diambil dari Bahasa Inggeris bermaksud 'atas'. Ia biasanya diletakkan di ruang komentar di Facebook bagi menaikkan sesebuah entri yang dikemaskini agar sentiasa dilihat dan dibaca oleh pengguna media sosial tersebut.

natijahnya boleh mengaibkan mana-mana individu, mengancam keselamatan negara dan juga menjejaskan akidah seseorang mukmin.

Mengambil kira bahayanya tindakan yang tidak baik ini, undang-undang di negara ini telah melarang penyebaran bahan kandungan yang sumbang, lucah, palsu, mengancam atau jelik dengan niat untuk mengacau, mendera, mengugut atau mengganggu mana-mana orang. Dalam erti kata lain, apa-apa yang dikatakan jenayah di alam nyata oleh undang-undang negara maka ia turut dilarang di dalam dunia siber.

Perkongsian maklumat yang salah dan tidak tepat berkaitan agama Islam khasnya boleh mengundang

kekeliruan terhadap pengguna mengenai agama Islam. Lebih buruk lagi, dakwaan serta doktrin palsu mengenai Islam dikhuatiri boleh merosakkan akidah seseorang muslim. Dalam konteks ini sebarang celaan, cemuhan atau sendaan bagi sebarang amalan, upacara atau undang-undang yang berhubung dengan agama Islam dianggap sebagai satu kesalahan.

Enakmen Kesalahan Jenayah Syariah Negeri Pulau Pinang (EKJSNPP) 1996 telah memperuntukkan seperti berikut:

Seksyen 4: Kesalahan menyebarkan ‘**Doktrin Palsu**’

Seksyen 6: Kesalahan menyebarkan ‘**Dakwaan Palsu**’

Seksyen 7: Kesalahan ‘**Penghinaan Terhadap Agama Islam**’

Selain daripada enakmen yang disebutkan di atas, terdapat peraturan atau undang-undang lain yang diguna pakai untuk mengawal jenayah siber, iaitu Akta Komunikasi dan Multimedia 1998.

Suruhanjaya Komunikasi dan Multimedia Malaysia (SKMM) juga telah mengenal pasti beberapa bentuk baru jenayah siber iaitu:

Buli Siber (Cyber Bully)	Digunakan oleh pelajar-pelajar untuk membuli rakan-rakan termasuk guru mereka.
-----------------------------	--

Pengendap Siber (Cyber Stalking)	Penjenayah mengintip mangsa dan menyelidik segala maklumat dan aktiviti mangsa.
Tatahias Siber (Cyber Grooming)	Penjenayah cuba mendapatkan kepercayaan mangsa bertujuan mendapatkan wang, seks dan menjadi ‘keldai dadah’ atau pengganas.
Pencuri Identiti (Identity Theft)	Penjenayah mencuri maklumat akaun bank mangsa melalui proses pembelian barang secara atas talian.

Justeru, peranan masyarakat amat penting dalam memastikan setiap perkara yang berlawanan dengan syariat mahupun yang bertentangan dengan undang-undang dapat dibendung.

Konsep ‘*tabayyun*’ hendaklah diletakkan sebagai indikator tertinggi dalam memartabatkan diri kita sebagai seorang mukmin yang bertanggungjawab. Ianya bertepatan dengan firman Allah SWT yang bermaksud:

“*Hai orang-orang yang beriman, jika datang kepadamu orang fasik membawa suatu berita, maka periksalah dengan teliti agar kamu tidak menimpakan suatu musibah kepada suatu kaum tanpa mengetahui keadaannya yang menyebabkan kamu menyesal atas perbuatanmu itu.*”
(Surah al-Hujurat ayat 6) ❖

Jenayah Siber - “Keldai Akaun”

‘Keldai Akaun’ merupakan akaun milik individu yang telah disalah guna oleh sindiket atau ‘*scammer*’ bagi menjalankan sebarang transaksi tanpa atau diketahui oleh pemilik.

Dalang kegiatan jenayah siber ini adalah warga asing yang memerlukan individu tempatan sebagai ‘orang tengah’ atau keldai akaun bagi mendapatkan akaun untuk melakukan transaksi pemindahan wang melalui akaun. Ganjaran dari segi wang dan barangan berharga selain dikaburi dengan ‘hubungan cinta’ oleh dalang utama digunakan oleh dalang tersebut kepada pemilik akaun tersebut.

Menurut Jabatan Siasatan Jenayah Komersial (JSJK) Bukit Aman dalam operasi Mule Account Siri 1/2018, kebanyakan pemilik akaun yang ditahan terdiri daripada wanita yang rata-rata mempunyai hubungan dengan dalang selain daripada pelajar, suri rumah atau penganggur. Ia melibatkan 319 kertas siasatan jenayah siber membabitkan kerugian berjumlah RM17.29 juta dalam tiga modus operandi jenayah siber iaitu Macau Scam, African Scam dan E-Financial Fraud.
– Sumber: Berita Harian, 5 Mac 2018 ❖



Suruhanjaya Komunikasi dan Multimedia telah melancarkan portal **Sebenarnya.my**, sebuah pusat sehati bagi rakyat Malaysia untuk menyemak sebelum berkongsi berita yang tidak ditentukan kesahihannya, yang diterima secara dalam talian melalui platform media sosial, perkhidmatan mesej segera, blog, laman sesawang, dan lain-lain. Dengan slogan “**Tidak Pasti Jangan Kongsi**”, portal ini adalah medium bagi membantu menghalang penularan berita palsu dalam talian yang boleh memberi kesan kepada masyarakat dan negara. Selain dapat diakses melalui laman web, aplikasi portal ini juga boleh dimuat turun di *Google Play Store* dan *App Store*. ❖



Tanya Sama Google

Sudah menjadi satu fenomena yang digemari oleh semua lapisan masyarakat, sama ada yang muda atau yang tua menggunakan *Google* dalam mendapatkan sebarang maklumat. Tahukah anda *Google* merupakan enjin carian yang terbaik pada masa kini. Semua maklumat yang anda inginkan dengan mudah dan cepat hanya di hujung jari. Sama ada betul atau salah maklumat yang diambil dari *Google* itu soal kedua. Apa yang penting maklumat boleh diperolehi dengan segera.

Google merupakan salah satu enjin carian yang paling popular. Masyarakat kini nampaknya lebih cenderung memilih maklumat dari 'Ustaz *Google*' berbanding bertanya dengan ustaz yang sebenar. Sedangkan maklumat di dalamnya bersifat menyeluruh, tidak pasti sama ada sahih atau tidak.

Hakikatnya, sepantas mana maklumat yang boleh diambil pasti ada kebaikan dan kelemahan. Sesiapa sahaja di dunia boleh memasukkan apa sahaja maklumat termasuk yang berkaitan agama Islam. Muslim yang baik sudah pasti akan menyampaikan dan menyalurkan maklumat dengan niat yang baik. Namun mungkin ada yang berniat sebaliknya.

Bagi golongan yang anti-Islam sudah tentu dengan sengaja menyalurkan maklumat yang tidak tepat untuk memesongkan umat Islam dari jalan yang sebenar.

Oleh itu sebagai pengguna, kita perlu meneliti dan mencari fakta yang sebenar, bukan menerima semua kandungan *Google* secara membuta tuli.

Segala maklumat yang diambil melalui *Google* berkaitan agama terutamanya, tidak boleh dipandang remeh jika terdapat keraguan dan kesilapan. Menjadi tanggungjawab setiap Muslim untuk memperbetulkannya.

Google tidak boleh dipersalahkan dalam soal menyalur atau menerima sebarang maklumat. Semuanya terletak di tangan pemberi maklumat, sama ada menyalurkan secara betul atau berniat jahat.

Google hanyalah satu alat yang sangat memberi manfaat kepada semua pengguna. Tanpa *Google* semua maklumat agak sukar dicari dengan pantas dan mudah.

Umat Islam akan dianggap kolot sekiranya kita menolak penggunaan *Google* secara total. Namun penggunaannya perlu diiringi dengan sikap berhati-hati dan teliti dalam menentukan kesahihan.

Bacaan, semakan dan rujukan kepada buku-buku, kitab-kitab muktabar dan para alim ulama tidak boleh sama sekali dikesampingkan. Utamakan pembelajaran sepanjang hayat bersesuaian dengan peringatan:

"Oleh itu bertanyalah kamu (wahai golongan musyrik) kepada orang-orang yang berpengetahuan agama jika kamu tidak mengetahui." (an-Nahl: 43) ❖

Fungsi Google:

- Membantu mendapatkan maklumat.
- Medium memindah, mengambil dan melontarkan pandangan.
- Medium mengumpul segala maklumat tanpa dapat dipastikan kesahihan.

Panduan Menapis Maklumat di Internet

- Merujuk kepada sumber yang asal seperti kitab-kitab tafsir, hadis dan kitab-kitab yang muktabar.
- Melihat kredibiliti penulisnya sama ada seorang Islam atau tidak. Jika penulisnya seorang Islam, pegangan dan aliran yang dipegangnya hendaklah dikenal pasti.
- Merujuk kepada ulama dan orang-orang yang lebih arif dalam perkara yang meragukan.



Oleh: Norhasni binti Othman
Bahagian Pengurusan Halal

KOD 'E' TIDAK SEMESTINYA HARAM

Tular Popular: Kod E

Kod-E merupakan kod bahan aditif yang dibenarkan penggunaannya dalam produk makanan dan perlu dipamerkan di label produk makanan. Asalnya ia digunakan di negara-negara kesatuan Eropah. Oleh kerana itulah, huruf 'E' yang digunakan itu sendiri merujuk kepada Europe (Eropah).

Namun kini, kod-E digunakan secara meluas di seluruh dunia sebagai satu standard antarabangsa bagi penghasilan produk makanan. Kod-E adalah suatu Sistem Penomboran Antarabangsa (INS) yang terkandung dalam Codex Alimentarius iaitu suatu standard makanan antarabangsa yang mengandungi garis panduan dan kod amalan bertujuan memastikan keselamatan makanan.

Ia digunakan sebagai kaedah pengenalanpastian jenis aditif makanan yang digunakan oleh pengeluar. Hanya bahan aditif makanan yang dijelaskan dalam Codex Alimentarius sahaja disahkan selamat untuk dimakan.

Kod E yang seringkali ditularkan ialah E471 iaitu pengemulsi yang berfungsi sebagai pengikat antara dua bahan yang tidak boleh sebatu secara asalnya seperti lemak/ minyak.

"Hai orang-orang yang beriman, jika datang kepadamu orang fasik membawa suatu khabar berita, maka periksalah dengan teliti, agar kamu tidak menimpakan musibah kepada suatu kaum tanpa mengetahui keadaannya yang menyebabkan kamu menyesal atas perbuatanmu itu."
(Al-Hujuraat: 6)

Pengemulsi	Sumber	Produk-produk menggunakan Pengemulsi:
1. Gelatin	Kulit/ tulang haiwan ruminan/ babi, sisik ikan	1. Aiskrim 2. Keju 3. Yogurt 4. Marjerin 5. Sos salad 6. Krimer
2. Garam Fosfat/ Sodium Fostat, Sodium Stearyl Lactylate	Sodium karbonat atau sodium hidroksida, Asid Laktik, Asid Stearik (minyak tumbuhan atau lemak haiwan)	7. Produk-produk bakeri
3. DATEM	Asid Tartarik, Mono-digliserida (minyak tumbuhan atau lemak haiwan)	

Sesuatu pengemulsi itu boleh sahaja bersumberkan bahan mineral, kimia, tumbuhan dan haiwan seperti minyak tumbuhan, haiwan halal sama ada disembelih menurut syarak atau tidak dan haiwan yang haram dimakan seperti babi. Maka inilah tugas agensi berkuasa negara dan luar negara bagi mengesahkan status halal sesuatu produk makanan.

Masyarakat tidak perlu ragu-ragu untuk membeli produk makanan yang mempunyai logo Halal Malaysia atau logo-logo halal luar negara daripada Badan Pensijilan Halal Luar Negara yang diiktiraf JAKIM walaupun terdapat bahan aditif E471 tercatat di label pembungkusan. Ini kerana pihak berkuasa telah pun membuat semakan terperinci secara dokumentasi dan pengesahan di kilang termasuklah analisa makmal sebelum sesuatu sijil halal dikeluarkan.

Jadilah pengguna yang bijak dengan tidak menjatuhkan hukum tanpa menyemak kesahihan produk terlebih dahulu. Amalkan 3S: **Semak Sebelum Sebar** terhadap sebarang berita yang diperolehi. Pilihlah produk yang telah dipersijilkan halal.

Kesahihan produk dengan logo Halal Malaysia dan logo-logo halal luar negara daripada Badan Pensijilan Halal Luar Negara bolehlah disemak pada carian status halal di laman web rasmi Halal Malaysia iaitu www.halal.gov.my. Pengguna juga boleh mengakses info halal dengan memuat-turun aplikasi "MyJAKIM" secara percuma daripada Google Play Store dan AppStore. ❖

Berikut merupakan pengkelasan Kod E:-

E100-E199:	Pewarna	E400-E499 :	Pemekat, pelembap, pengemulsi, penstabil	E700- E799:	Antibiotik
E200-E299:	Pengawet	E500- E599:	Garam, regulator asid, agen penghalang kerak	E900-E999:	Pemanis
E300-E399 :	Oksidan, fosfat, antioksidan, pengawal asid	E600-E699:	Penambah perisa dan bau	E1000-E1999:	Lain-lain aditif



Oleh: Mohd Fauzi bin Ibrahim
Pejabat Agama Daerah Timur Laut

JADI MUSLIM SECARA ONLINE?

Apabila seseorang mengakses laman e-Saudara melalui <http://esaudara.penang.gov.my>, matanya pasti tertancap pada suatu perkataan '**Permohonan Online Memeluk Islam Negeri Pulau Pinang**'. Hati akan terdetik untuk mengaguminya sambil fikiran membayangkan: *"Oh! Alangkah mudahnya nak masuk Islam di Pulau Pinang. Hanya akses sistem e-Saudara, cari panduan memeluk Islam, lafazkan syahadah. Nah... dah jadi muslim. Semudah ABC."* Namun, apakah fungsi sebenar E-Saudara? Laman Inovasi kali ini cuba merungkai persoalan tersebut.

E-Saudara merupakan lanjutan sistem terdahulu dalam usaha memenuhi keperluan semasa. Ia diperkenalkan oleh Bahagian Dakwah, Jabatan Hal Ehwal Agama Islam Pulau Pinang untuk menyimpan maklumat pemelukan Islam seluruh negeri. Antara ciri-ciri baharu yang

diperkenalkan untuk capaian awam adalah **Proses Pemelukan Islam yang boleh dibuat secara dalam talian**. Proses tersebut melibatkan:

1. Membuat permohonan secara dalam talian yang boleh diakses melalui laman web E-Saudara.
2. Pemohon akan dijemput untuk melafazkan syahadah di hadapan Pendaftar Muallaf bagi memastikan pemohon memenuhi syarat-syarat yang ditetapkan.

Perlu diambil perhatian, permohonan secara dalam talian akan diterima dan didaftarkan setelah memenuhi syarat-syarat berikut:

1. Pemohon telah mencapai umur 18 tahun.
2. Memeluk Islam secara sukarela dan sempurna akal.
3. Syahadah dilafazkan di hadapan dua orang saksi.

Selain itu, sistem ini memberi peluang kepada pihak-pihak yang diberi autoriti untuk mengakses data-data pengislaman pada bila-bila masa. Turut dimuatkan adalah maklumat berkaitan saudara muslim, pengenalan agama Islam, program, modul dan kelas pengajian selain statistik pengislaman. Maklumat ini akan dikemaskini dari semasa ke semasa berdasarkan keperluan.

Secara umumnya, sistem ini telah membuka dimensi baharu dalam pengurusan saudara muslim di negeri Pulau Pinang yang lebih efisien dan mesra pengguna. ❖



Oleh: Azizah binti Mat Isa
Bahagian Undang-undang Keluarga Islam

DEKAT TAPI JAUH...

Gajet menurut *Wikipedia* adalah alatan kecil teknologi elektronik yang mempunyai fungsi yang khusus seperti telefon pintar, *notebook* dan sebagainya. Alat yang dicipta berabad lalu menjadi sesuatu yang mesti dimiliki, bukan lagi dianggap sebagai barangan mewah. Semua lapisan masyarakat sama ada yang berpendapatan rendah atau tinggi kebiasaannya memiliki sekurang-kurangnya sebuah gajet. Ramai yang sanggup menghabiskan masa, wang ringgit dan beratur panjang hanya untuk menjadi pembeli terawal gajet terkini. Kegilaan apakah ini?

Tidak dapat dinafikan alat ini punya manfaat yang besar. Namun pada masa yang sama ia juga memberikan implikasi yang tidak sihat dalam hubungan kekeluargaan. Teknologi semakin menjadikan manusia ralit dan lalai dari tanggunjawab yang sebenar. Sering dilihat senario sebuah keluarga yang makan semeja, tetapi mata mereka hanya tunduk memandang skrin. Ketaksuban ini menjadikan perhubungan semakin hambar dan dingin. Pada zahirnya dekat tapi hakikatnya 'jauh'.

Masing-masing sibuk memuat naik status terkini tentang kehidupan seharian. Buktinya dapat kita lihat di laman sosial seperti '*Facebook*', '*Instagram*' dan '*Twitter*'. Masa bersama ahli keluarga semakin kurang berkualiti kerana hilangnya sentuhan dan

komunikasi. Saling bergurau senda, bermain, berkongsi cerita, makan dan solat bersama sepertinya sudah tidak menjadi agenda utama keluarga. Si bapa, ibu dan anak-anak, sibuk bersembang kosong dan berlawak jenaka bersama ahli kumpulan maya masing-masing. Ini mendorong kepada keretakan rumahtangga yang dilihat semakin menjadi-jadi hanya kerana gajet.

Kajian terbaru oleh University Of Michigan di C.S Mott Children's Hospital ke atas 170 ribu pasangan di Amerika mendapati tingkah laku yang buruk berkait rapat dengan masa yang dihabiskan oleh ibu bapa dengan gajet. Menurut Profesor Dr. Zabidi Azhar Mohd Husin, Ketua Kluster Kesihatan Kanak-kanak Majlis Profesor Negara, penggunaan gajet tanpa batasan telah mewujudkan sosialisasi yang agak terhad antara manusia. Hubungan dengan saudara-mara terjejas. Saat semuanya berkumpul, masa lebih banyak ditumpu kepada gajet berbanding berbual sesama mereka. Kanak-kanak pula berkerumun hanya untuk melihat rakan bermain permainan video terkini. Selain itu, keluarga yang membiarkan penggunaan gajet yang melampau akan menyusutkan nilai moral dan menjadikan anak-anak semakin liar dan agresif.

Oleh itu, tema Rumahku Syurgaku hanya akan direalisasi apabila kemesraan, sentuhan dan komunikasi dikembalikan. Interaksi teknologi sama sekali tidak boleh menggantikan elemen hubungan kekeluargaan. Rumahtangga akan kurang harmonis jika komunikasi semakin menipis. Jika keasyikan kita kepada teknologi menjadi penyebab, maka rancang penggunaan gajet sebaiknya.

Sayangi keluarga, semarakkan kehangatan hubungan suami isteri, santuni anak-anak, isilah masa bersama mereka dengan penuh manfaat. Teknologi untuk mendekatkan yang jauh, menambah mesrakan yang dekat. Tiada apa yang lebih bernilai dari memiliki keluarga yang bahagia dan berjaya di dunia dan akhirat. ❖

Bil	PROGRAM	Tarikh	Tempat
1.	Kursus Kaunseling Maqasid Al-Syariah (Siri 1 & 2)	7-8 April & 23-24 April 2018	Masjid Abdullah Fahim, Kepala Batas, Pulau Pinang
2.	Lawatan Mahabbah Guru Takmir	14 Februari 2018	6 daerah seluruh Negeri Pulau Pinang
3.	Program Multaqa Peringkat Negeri Pulau Pinang	3 Mac 2018	Dewan Sri Pinang, Pulau Pinang
4.	Majlis Pengijazahan Sanad Surah Al-Fatihah dan Surah-surah Lazim oleh Syeikh Kurayyim Rajih	15 Januari 2018	Masjid Abdullah Fahim, Kepala Batas
5.	International Academic Festival 2018	6-8 Februari 2018	Chariyatsamsuksa, School of Songkhla, Thailand
6.	Kursus Grafik – Perisian Telefon	21-22 Februari 2018	Kolej Komuniti, Kepala Batas
7.	Lawatan Persatuan Mahasiswa Pentadbiran Islam dan Syariah (PERSYA), Universiti Sultan Zainal Abidin (UNISZA) Kampus Gong Badak.	5 April 2018	Dewan Syarahan Masjid Negeri Pulau Pinang
8.	Bengkel Pemurnian Teks Khutbah dan iFikrah 2018	18-20 April 2018	Akademi MyAngkasa, Langkawi, Kedah
9.	Program Pengukuhan Metodologi Dakwah	11-14 Mei 2018	Pulau Perhentian, Kuala Besut, Terengganu
10.	Program Jelajah Ibrah al-Quran bersama Ustaz Don Daniyal sempena Sambutan Bulan-bulan al-Quran Peringkat Negeri Pulau Pinang	Mac hingga Mei 2018 (sepanjang bulan)	Sepanjang Bulan Sepanjang Mac hingga Mei 2018
11.	Booth Halal - Penang International Halal Expo & Conference 2018 (PIHEC)	29-28 Januari 2018	Spice Arena, Bayan Baru
12.	Kursus Pengacaraan Majlis dan Emcee	19-20 Mac 2018	Pejabat Agama Daerah Kepala Batas, Pulau Pinang
13.	Kursus Persembahan Multimedia dan Penerbitan Montaj	16-17 April 2018	Institut Latihan Kemahiran Mawa, Jawi, Pulau Pinang

soalan

Apakah hukum membayar fidyah puasa menggunakan barang kemas?



jawapan

Membayar fidyah barang kemas untuk orang yang telah mati adalah bertaklik kepada Mazhab Imam Hanafi yang membolehkan fidyah dengan apa juga harta yang ada dengannya. (Mazhab Syafie - fidyah puasa adalah barang makanan seperti beras). Bagi mereka yang hendak membayar fidyah barang kemas untuk si mati hendaklah mengikut syarat seperti barang kemas itu hendaklah kepunyaan si mati atau kepunyaan waris si mati, bukan dipinjam daripada orang lain.

SUMBER: <http://efatwa.penang.gov.my>

soalan

Apakah hukum pembinaan masjid daripada dana loteri kebajikan masyarakat?

i-FIQH

jawapan

Hukum membina masjid daripada sumber yang haram seperti dana loteri kebajikan masyarakat adalah haram. Manakala solat di masjid tersebut adalah sah dan mendapat pahala, insya-Allah.





zon aulad

Surah dalam al-Quran

Ayuh, sahut cabaran Cari Kata Jawi ini dengan mencari 10 nama Surah di dalam al-Quran. Jom, cari bersama-sama.

الفاتحة	الكهف	قاف
يوسف	مريم	النور
يونس	لقمان	
إبراهيم	هود	

ا	ل	ف	ا	ت	ح	ة	ي	م	ن	ك
ل	د	ا	م	ل	ن	ك	ق	ن	و	ق
ك	ا	ق	و	ت	ن	و	د	د	ن	ي
ه	ه	ب	ا	ا	و	و	و	م	ت	ل
ف	ي	ك	م	ي	ه	ا	ر	ب	ا	ا
ي	ي	ق	م	ي	ا	ي	س	ا	ن	ا
و	ل	م	و	ل	م	ن	و	و	غ	ا
ل	ا	ا	ت	غ	م	د	و	ن	و	ل
ي	ر	و	و	غ	ا	غ	ي	و	س	ف

Lughatul Arabiah

Pakaian

Isikan tempat kosong dengan memilih perkataan yang betul.

Kemeja

Seluar Jean

Kaftan

Blaus

T-shirt

Jubah

Jaket

Skirt

Pilihan Jawapan:

عَبَاءَةٌ / جَلَابِيَّةٌ

قَمِيصٌ

تَنْوَرَةٌ

تِي شِيرْت

بَلُورَةٌ

بَنْطَلٌ جِينَز

فُفْطَان

جَاكِيت

TEKA SILANG KATA



Melintang

- Titian yang akan dilalui oleh manusia pada hari kiamat untuk melintasi neraka ke syurga.
- Tempat yang akan dimasukkan manusia yang beramal soleh.
- Perang pertama umat Islam melawan musuh.
- Buah yang dimakan oleh Nabi Adam dan Hawa sehingga mereka diturunkan ke bumi.
- Nabi yang dilahirkan tanpa ayah.

Menegak

- Perang yang merupakan perang lanjutan daripada perang Mu'tah.
- Pengikut Rasulullah yang berhijrah dari Makkah ke Madinah dipanggil.
- Penduduk Madinah yang menyambut kedatangan Nabi Muhammad bersama orang Muslimin Makkah ke Madinah.
- Perang yang berlaku pada bulan Syawal.
- Nabi yang umatnya mengamalkan ajaran songsang iaitu hubungan sejenis lelaki dengan lelaki.